

摘藻堂四庫全書薈要

集部

欽定四庫全書薈要

集部

御定詠物詩選卷二百

七十七至
八十七

欽定四庫全書蒼要卷一萬八千八百九十九集部

御定佩文齋詠物詩選卷二百七十七

松類

五言古

附長短句

贈從弟

魏
劉楨

亭亭山上松
瑟瑟谷中風
風聲一何盛
松枝一何勁
冰霜正慘悽
終歲常端正
豈不罹凝寒
松柏有本性

寒松

梁
沈約



梢聳振寒聲青蔥標暮色疎葉望嶺齊喬幹凌雲直

詠寒松

梁范雲

修條拂層漢密葉障天濤凌風知勁節負雪見貞心

詠慈姥磯石上松

梁吳均

根為石所蟠枝為風所碎賴我有貞心終凌細草輩

應制賦銅鞮山松

北魏元勰

問松林松林經幾冬山川何如昔風雲與古同

詠松樹

隋李德林

結根生上苑擢秀遍華池歲寒無改色年長有倒枝露
自金盤灑風從玉樹吹寄言謝霜雪貞心自不移

題張老松樹

唐
宋之問

歲晚東巖下周顧何悽惻日落西山陰衆草起寒色中
有喬松樹使我長歎息百尺無寸枝一生自孤直

石子松

唐
儲光羲

盤石青巖下松生盤石中冬春無異色朝暮有清風五
鬣何人采西山舊兩童

南軒松

唐

李白

南軒有孤松柯葉自綿幕清風無閒時瀟灑終日夕陰
生古苔綠色染秋煙碧何當凌雲霄直上數千尺

庭松

唐

白居易

堂下何所有十松當我階亂立無行次高下亦不齊高
者三丈長下者十尺低有如野生物不知何人栽接以
青瓦屋承之白沙臺朝昏有風月燥濕無塵泥疎韻秋
槭槭涼陰夏淒淒春深微雨夕滿葉珠蓑蓑歲暮大雪

天壓枝玉皚皚四時各有趣萬木非其儕去年買此宅
多為人所詒一家二十口移轉就松來移來有何得但
得煩襟開即此是益友豈必交賢才顧我猶俗士冠蓋
走塵埃未稱為松主時時一愧懷

松聲

白居易

月好好獨坐雙松在前軒西南微風來潛入枝葉間蕭
寥發為聲半夜明月前寒山颯颯雨秋琴泠泠絃一聞
滌炎暑再聽破昏煩竟夕遂不寐心體俱翛然南陌車

馬動西鄰歌吹繁誰知茲簷下滿耳不為喧

贈賣松者

白居易

一束蒼蒼色知從澗底來
斲掘經幾日枝葉滿塵埃
不買非他意城中無地栽

西齋小松

唐元稹

松樹短於我清風亦已多
況乃枝上雪動搖微月波
幽姿得閒地詎感歲蹉跎
但恐厦終構藉君當奈何

詠道上松

宋孔平仲

長松高落落積雪白皚皚鱗鬣凍且僵鬱結久不開觀
其纏壓意直使同枯荻雁帶寒光去鳥傳春信來微陽
入直榦生意忽已回豁若醉初醒整頓出塵埃秀色媚
山腹孤標摩斗魁時至自當復安得長摧頽若非根本
壯何能異草萊

同希顏怪松

金馮壁

崧高地氣靈花木競妍秀玉峯西南趾有松獨怪陋偃
蹇如蟠螭奮迅如攫獸葉勁鬚髯張皮古鱗甲皴菌蠢

藤瘦怒支離
筇節瘦月上
虬影搖風度
雨聲驟子落
慰枯禪枝
樛礙飛鼪
盤根萬乘器
平蓋千歲壽
樵斤幸免辱
厦匠矧肯構
龍化會有時
天早期汝救

樂山松

金
劉從益

樂山一何崇
上有千歲松
清孤月露底
秀拔天地中
蒲柳抱常質
桃李開芳容
爭如十八公
笑傲冰霜風
居然喜避世
不肯汙秦封
蟠如北海螭
伏如南陽龍
紛紛過者多
匠石終不逢
明堂幾時構
喚起蒼髯翁

種松

元 劉 因

萬牛來丘山大厦高崔嵬當年誰苦辛遺此千歲材手
持百松子與之俱傾頽殷勤囑造物為護荒山隈今來
見豪末喜溢蒼煙堆十年望根立百年排風雷自此千
萬年再見明堂開東家十年計戢戢千頭栽豈不早有
望求此良悠哉

題松雲齋十五韻

元 葉 顥

青松如舞蛟白雲如遊龍龍遊化甘霖與世為年豐蛟

舞散清影利爪拏高穹二者無限奇盡入幽人宮幽人
室懸磬隱約松雲中松秀悅耳目雲生盪心胸讀書坐
雲石鼓琴雜松風無往不自得深喜世慮空披雲採松
花何啻食萬鍾萬鍾食有盡松花味無窮松雲幸無恙
天地同始終扶筇一相顧摩雲撫孤松問松幾年適
與雲會同松靜了不言雲去尋無蹤回首萬峯頂但見
山重重

松壑

明

袁凱

矯矯千歲姿生此衆石間微颺度巖阿殷殷起波瀾幽
人一壺酒日夕自怡顏安得川上舟與子相往還

聽松

明邵寶

聽松復聽松松聲在高閣閣成四十年聽者今如昨風
來春濤生風去秋濤落當其無風時蕭然亦微作聽者
聽於斯冥心對寥廓

松下居

明僧宗泐

我此松下居即事良可悅閉戶留白雲開軒放明月松

響風忽來泉流雨初歇時有西齋人相親默無說

七言古

附長短句

靈谿老松歌

唐

盧士衡

靈谿古觀壇西角千尺鱗皴棟梁樸橫出一枝戛樓閣
直上一枝掃寥廓白日蒼苔擁根脚月明風撼寒光落
有時風雨晦暝擺撼若黑龍之騰躍合生於象外峰巒
枉滯乎人間山岳安得巨靈授請託拔向青桂白榆邊

安著

小松歌

唐
李咸用

幽人不喜凡草生
秋鋤斲得寒青青
庭間土瘦根脚癯
風搖雨拂精神醒
短影月斜不滿尺
清聲細入鳴蛩夕
天人戲剪蒼龍髯
參差簇在瑤階側
金精水鬼欺不得
長與東皇逞顏色
勁節暫因君子移
貞心不為麻中直

松障圖歌

元
陳泰

何人獨立身堂堂
十八公子鬚髯蒼
凝冰不遣勢摧折
清籟時與髯低昂
蘭為兄兮雪為友
燕坐松間自呼酒

眼花耳熱鱗鬣生千尺龍蛇入揮手手中松月自離筆
已見雲煙生蒼鬱倘非白晝堂宇空真恐幽陰鬼神出
平生始識顏平原堅苦絕勝甜中邊世間畫史千金價
惜哉此松不多畫

賦得貞松壽姑蘇張繼孟八十

明

劉溥

徂徠之松何蜿蜒根盤厚地枝摩天氣橫東南動光彩
泰山風雪衡山煙長風吹天天宇開颯颯海濤天上來

世間草木總卑小如就彭祖觀嬰孩古來君子不改德
松亦何嘗改其色徃徃工師求棟梁重如山岳誰移得
春風細灑金粉香茯苓寒凝琥珀光為君取此製春酒
飲之看壽同無疆

五言律

松

唐
李嶠

鬱鬱高巖表森森幽磎陞鶴棲君子樹風拂大夫枝百
尺條陰合千年蓋影披歲寒終不改勁節幸君知

嚴鄭公階下新松得霑字

唐
杜甫

弱質豈自負移根方爾瞻細聲聞玉帳疎翠近珠簾未
見紫煙集虛蒙清露霑何當一百丈歌蓋擁高簷

松

唐
陸肱

霜雪知勁質今古占嘉名斷砌盤根遠疎林偃蓋清鶴
棲何代色僧老四時聲鬱鬱心彌久煙高萬井生

高松

唐
李商隱

高松出衆木伴我向天涯客散初晴後僧來不語時有

風傳雅韻無雪試幽姿上藥終相待他年訪伏龜

廣德官舍二松

唐
喻 鳧

楊公休簿領二木日堅牢直甚彰吾節清終庇爾曹幽
陰月裏細冷樹雪中高誰見干霄後枝飄白鶴毛

和李用夫栽小松

唐
項 斯

移來未換葉已勝在空山靜對心標直遙吟境助閒影
侵殘雪際聲透小窗間即聳凌空幹脩脩豈易攀

題唐興寺小松

唐
杜荀鶴

雖小天然別難將衆木同侵僧半窗月向客一襟風枝
拂行苔鶴聲分叫砌蟲如今未堪看須待雪霜中

和薛侍御題興善寺松

唐許崇

何年斲到城湫國響高名半寺陰常匝鄰坊景亦清代
多無巧勢風定有餘聲自得天然狀非同澗底生

移小松

唐張喬

松子落何年纖枝長水邊斲開新澗雪移出遠林煙帶
月棲幽鳥兼花灌冷泉微風動清韻閒聽罷琴眠

僧院松

唐
曹松

此木韻彌全
秋宵學瑟絃
空知百餘尺
未定幾年古
甲磨雲拆孤
根捉地堅
何當拋一榦
作蓋道場前

鄭穀補闕山松

唐
張蠙

心將積雪欺
根與白雲離
遠寄僧猶憶
高看鶴未知
影交新長葉
斂匝舊生枝
多少同時種
深山不得移

述松

唐
王貞白

遠谷呈材榦
何由入棟梁
歲寒虛勝竹
功績不如桑
秋

老落乾子春深衰嫩黃雖蒙匠者顧樵採日難防

松

唐僧無可

枝幹怪鱗皴烟梢出澗新屈盤高極目蒼翠遠驚人待
鶴移陰過聽風落子頻青青寒木外自與九霄鄰

賦松

南唐謝仲宣

送人多折柳唯我獨吟松若保歲寒在何妨霜雪重森
梢逢靜境廓落見孤峰還似君高節亭亭豈繼蹤

赤松詠

明傅汝舟

赤松五千丈一丈一雲生蛟龍分葉卧雷雨抱枝鳴陰
好鶴長在巢居仙自營斲苓須指夕輔取九丹成

松

明

申時行

宛轉隨高阜青蔥結茂林團雲低蓋影挾雨送濤音節
抱風霜苦根盤歲月深亦知弘景意山閣助清吟

五言排律

貢院樓北新栽小松

唐

李正封

青蒼初得地華省植來新尚帶山中色猶含洞裏春近

樓依北戶隱砌淨游塵鶴壽應成蓋龍形未有鱗為梁
資大廈封爵恥羸秦幸此觀光日清風屢得親

貢院樓北新栽小松

唐
錢衆仲

愛此凌霜操移來獨占春貞心初得地勁節始依人晚
月煙猶薄當軒色轉新枝低無宿羽葉淨不留塵每與
芝蘭近常慙雨露均幸因逢顧盼生植及茲辰

貢院樓北新栽小松

唐
吳武陵

拂檻愛貞容移根自遠峰曾經芳草沒終不住苔封葉

少初凌雪鱗生欲化龍
乘春濯雨露得地近垣墉
逐吹香微動含烟色漸濃
時迴日月照為謝小山松

禁中春松

唐陸贄

陰陰清禁裏蒼翠滿春松
雨露恩偏近陽和色更濃
高枝分曉日靈韻雜宵鐘
香助爐煙遠形疑蓋影重
願符千載壽不羨五株封
倘得迴天眷全勝老碧峰

禁中春松

唐周存

幾歲含貞節青青紫禁中
日華留偃蓋雉尾轉春風
不

為繁霜改那將衆木同千條攢翠色百尺澹晴空影密
金莖近花明鳳沼通安知幽澗側獨與散樗叢

禁中春松

唐常沂

映殿松偏好森森列禁中攢柯沾聖澤疎蓋引皇風晚
色連秦苑春香滿漢宮操將貞石固材與直臣同翠影
宜青瑣蒼枝秀碧空還知沐天眷千載更蔥龍

與楊十二巨源盧十九經濟同遊大安亭各賦

二物合為五韻探得石松

唐元稹

片石與孤松曾經物外逢
月臨棲鶴影雲抱老人峯
蜀客君當問秦官我舊封
積膏當琥珀新劫長芙蓉
待補蒼蒼去樛柯蚤變龍

中書相公任兵部侍郎日後閣植四松逾數年

澣忝此官因獻拙什

唐

鄭澣

丞相當時植幽襟對此開
人知舟楫器天假棟梁材
錯落龍鱗出襪襪鶴翅迴
重陰羅武庫細響靜山臺
得地公堂裏移根澗水隈
吳臣夢寐遠秦岳歲年推
轉覺飛

纓繆何因繼組來幾尋珠履跡願比角弓培柏悅猶依
社星高久照台後凋應共操無復問良媒

奉和四松

唐
唐 扶

幽抱應無語貞松遂自我寄懷丞相業因擢大夫材日
射蒼鱗動塵迎翠箒迴嫩葺含細粉初葉泛新杯偶聖
為舟去逢時與鶴來寒聲連曉竹靜氣結陰苔赫奕鳴
騶至熒煌洞戶開良辰一臨眺憩樹幾徘徊恨發風期
阻詩從綺思裁還聞舊凋契凡在此中培

奉和四松

唐
劉禹錫

右相歷中台移松武庫栽紫茸抽組綬青實長玫瑰便
有干霄勢看成構厦材數分天柱半影逐日輪迴舊賞
台階去新知谷口來息陰長仰望翫意幾徘徊翠粒晴
懸露蒼鱗雨起苔凝音助瑤瑟飄藥泛金罍月桂花遙
燭星榆葉對開終須似雞樹榮茂近昭回

奉和四松

唐
雍陶

右相歷兵署四松皆手栽斲時驚鶴去移處帶雲來根

倍雙桐植花分八桂開生成造化力長作棟梁材豈羨
蘭依省猶嫌柏占臺出樓終百尺入夢已三台幽韻和
宮漏餘香度酒杯拂冠枝上雪染履影中苔高位相承
地新詩寡和才何由比蘿蔓攀附在條枚

文宣王廟古松

唐
李 胄

列植成均裏分行古廟前陰森非一日蒼翠自何年寒
影煙霜暗晨光枝葉妍近簷陰更靜臨砌色相鮮每愧
聞鐘磬多慚接豆籩更宜教胄子於此學貞堅

七言律

松

唐
李山甫

地聳蒼龍勢抱雲天教青共衆材分孤標百尺雪中見
長嘯一聲風裏聞桃李傍他真是佞藤蘿攀爾亦非
羣平生相愛應相識誰道修篁勝此君

題子姪書院雙松

唐
曹唐

自種雙松費幾錢頓令院落似秋天能藏此地新晴雨
却惹空山舊燒煙枝壓細風過枕上影籠殘月到窗前

莫教取次成閒夢使汝悠悠十八年

題淨衆寺古松

唐
崔塗

百尺森疎倚梵臺昔人曾見此初栽故園未有偏堪戀
浮世如閒即合來天暝豈分蒼翠色歲寒應識棟梁材
清陰可惜不駐得歸去暮城空首回

松

唐
韓溉

倚空高檻冷無塵往事閒徵夢欲分翠色本宜霜後見
寒聲偏向月中聞啼猿想帶蒼山雨歸鶴應和紫府雲

莫向東園近桃李春光還是不容君

題吉水縣廳前新栽小松

唐

李中

斲開幽澗蘚苔斑移得孤根植砌前影小未遮官舍月
翠濃猶帶舊山煙羣花解笑香寧久衆木雖高節不堅
輸我婆娑欄檻內晚風蕭颯學幽泉

松

唐

炙轂子

寒松聳拔倚蒼岑綠葉扶疎自結陰丁固夢時還有意
秦皇封日豈無心常將正節棲孤鶴不遣高枝宿衆禽

好是特凋羣木後護霜凌雪翠逾深

龍形松

元
謝宗可

天矯擎雲海上來蜿蜒蛻骨老莓苔紫髯夜濕千山雨
鐵甲春生萬壑雷影動欲翻平陸起聲號如卷怒潮迴
蜷枝冷挂巖前月猶似擎珠照九垓

羅漢松

明
屠隆

何年蒼叟住禪林百尺婆娑萬壑陰四果總來成佛印
一官應不受秦侵靈根歲月跣趺久老榦風霜面壁深

謾謾回廳響空谷猶聞清夜海潮音

七言排律

遙同蔡起居偃松篇

唐張說

清都衆木總榮紛傳道孤松最出羣名接天庭長景色
氣連宮闕借氛氲懸池滴滴停華露偃蓋重重拂瑞雲
不惜流膏助仙鼎願將楨榦奉明君莫比冥靈楚南樹
朽老江邊代不聞

五言絕句

松下雪

唐錢起

雖因朔風至不向瑤臺側
惟助苦寒松偏明後凋色

千松嶺

唐顧況

終日吟天風有時天籟止
問渠何旨意恐落凡人耳

四望驛松

唐王建

當初此間別直至此庭中
何意聞聲耳聽他枝上風

小松

王建

小松初數尺未有直生枝
閒即傍邊立看多長却遲

題翰林院東閣小松

唐元稹

蒼礙修鱗亞霜侵簇翠黃惟餘入琴韻終待舜絃張

乳毛松

唐鄭谷

松格一何高何人號乳毛霜天寓直夜愧爾伴閒曹

松

宋徐鉉

細韻風中遠寒青雪後濃繁陰堪避雨効用待東封

松

金李俊民

鬱鬱愁無地青青獨有心疑從大夫後傾蓋到如今

七言絕句

憑韋少府班覓松樹子栽

唐 杜甫

落落出羣非檉柳青青不朽豈楊梅
欲存老蓋千年意為覓霜根數寸栽

酬道芬寄畫松

唐 劉商

聞道松花學沈寧寒枝浙瀝葉青青
一株將比囊中樹若箇年多有茯苓

松樹

唐 白居易

白金換得青松樹君既先栽我不栽幸有西風易憑仗
夜深偷送好聲來

省中題新植雙松

唐
賈島

端坐高宮起遠心雲高水闊共幽沈更堂寓直將誰語
自種雙松伴夜吟

采松花

唐
姚合

擬服松花無處學嵩陽道士忽相教朝來試上高枝采
不覺翻傾仙鶴巢

小松

唐

章孝標

爪葉鱗條龍不盤梳風幕翠一庭寒莫言只似人長短
須作浮雲向上看

書院二小松

唐

李羣玉

一雙幽色出凡塵數粒秋煙二尺鱗從此靜窗聞細韻
琴聲長伴讀書人

小松

唐

杜荀鶴

自小刺頭深草裏而今漸覺出蓬蒿時人不識凌雲木

直待凌雲始道高

澗松

唐
崔塗

寸寸凌霜長勁條
路人猶笑未干霄
南園桃李雖堪羨
爭奈春殘又寂寥

題僧院松

唐
曹松

空山澗畔枯松樹
禪老堂頭鱗甲身
傳是昔朝僧種著
下頭應有茯苓神

松嶺

唐
陸希聲

嶺上春松手自栽已能蒼翠映莓苔
歲寒本是君家事
好送清風月下來

松

唐
成彥雄

大夫名價古今聞盤屈孤貞更出羣
將謂嶺頭閒得了
夕陽猶挂數枝雲

華山孤松

唐
張蠩

石罅引根非土力冒寒猶助嶽蓮光
綠槐生在膏腴地
何得無心拒雪霜

畫松

唐
僧景雲

畫松一似真松樹且待尋思記得無曾在天台山上見
石橋南畔第三株

江路聞松風

金
趙可

雪裏雲山玉作屏松風入耳細泠泠朝來醉著江亭酒
却被髯龍喚得醒

靜芳亭

元
袁桷

簾外羣山當畫屏白雲如水度中庭松花落徑無人掃

失却莓苔一半青

御定佩文齋詠物詩選卷二百七十七

欽定四庫全書薈要卷一萬八千九百

集部

御定佩文齋詠物詩選卷二百七十八

柏類

五言古

庭柏

北齊

魏收

古松圖偃蓋新柏寫爐峯凌寒翠不奪
迎暄綠更濃
茹葉輕沈體咀實化衰容
將使中臺麝違山能見從

雙柏

元

陳樵

亭亭山上柏柯幹如青銅蒼古拔俗姿肯作兒女容風
霜日搖落萬木為之空爾獨不見摧屹立如老翁乃知
歸根妙生意恒內融願乘雷雨興化作雙飛龍

柏屏

明顧璘

壁立青玉屏下見古柏根相憐歲寒葉鬱作蒼雲屯貞
姿洗霜雪老氣橫乾坤名園非此種誰可當君門

七言古

古柏行

唐杜甫

孔明廟前有老柏柯如青銅根如石霜皮溜雨四十圍
黛色參天二千尺君臣已與時際會樹木猶為人愛惜
雲來氣接巫峽長月出寒通雪山白憶昨路繞錦亭東
先主武侯同闕宮崔嵬枝幹郊原古窈窕丹青戶牖空
落落盤踞雖得地冥冥孤高多烈風扶持自是神明力
正直原因造化功大厦如傾要梁棟萬牛回首丘山重
不露文章世已驚未辭剪伐誰能送苦心豈免容螻蟻
香葉終經宿鸞鳳志士幽人莫怨嗟古來材大難為用

五言律

使院中新栽柏樹子呈李十五栖筠

唐

岑參

愛爾青青色移根此地來不曾臺上種畱向磧中栽翠
葉欺門柳狂花笑院梅不須愁歲晚霜露豈能摧

穗柏聯句

唐

段成式

一院暑難侵莓苔共影深標枝爭息鳥餘吹正開襟
宿雨香添色殘陽石在陰乘閒動詩意助靜入禪心

張希復

古柏

唐
李洞

手植知何代年齊偃蓋松結根生別樹吹子落鄰峰古
榦經龍嗅高烟過雁衝可知繁葉盡聲不礙秋鐘

五言絕句

指柏軒

明
高啟

清陰護燕几中有忘言客人來問不應笑指庭前柏

七言絕句

武侯廟古柏

唐
雍陶

宿葉四時同一色高枝千歲對孤峯此中疑有精靈在
為見盤根是卧龍

題龍興寺老柏院

宋張在

南鄰北舍牡丹開年少尋芳去又迴惟有君家老柏樹
春風恰似不曾來

禹柏圖

元吳師道

柏貢荊州任土風漢陽遺樹尚蔥蘢休誇此是親曾植
四海青青盡禹功

御定佩文齋詠物詩選卷二百七十八

欽定四庫全書薈要卷一萬八千九百一

集部

御定佩文齋詠物詩選卷二百七十九

檜類

五言古

濟南廟中古檜同叔能賦

金

元好問

亭亭祠宮檜鬱鬱上雲雨扶持幾年造物心獨苦青
餘玉川潤根入鐵岸古雖含棟梁委斤斧安得取沈沈
地中久駭浪思一鼓天柱屹不移水國奠平土乾坤此

神物甲乙存世譜瀨鄉留耳孫闕里傳鼻祖秦松徒自
汗蜀柏聊共數會待十抱成茲焉重摩拊

長短句

致道觀看七星檜樹歌

明孫一元

海虞山前突兀見古檜眼中氣勢相盤拏上應七曜分
布有神會地靈千歲儲英華皴皮無文盡駁落老根化
石吞泥沙據山嵒嵒暎壑豁訝身枯溜雨枝黑藏蛇佇
立頃刻雲霧遮日落未落山之厓同行觀者皆歎嗟舌

捫頸縮無敢譁歸來靈物不可究夜宿撼牀恐龍鬪

五言律

畫檜

元虞集

茅山多古樹此檜更長生鶴鶴棲來穩蛟龍化得成雲
深還近戶月落似聞笙千載如相見蒼然故舊情

七言律

謝寺雙檜

唐劉禹錫

雙檜蒼然古貌竒含煙吐霧鬱參差晚依禪客當金殿

初耐將軍映畫旗
龍象界中成寶蓋
鴛鴦瓦上出高枝
長明燈是前朝焰
曾焰青青年少時

法雲雙檜

唐溫庭筠

晉朝名輩此離羣
想對濃陰去住分
題處尚尋王內史
畫時應是顧將軍
長廊夜靜聲疑雨
古殿秋深影似雲
一下南臺到人世
曉泉清籟更難聞

檜樹

唐秦韜玉

翠雲交榦瘦輪囷
嘯雨吟風幾百春
深蓋屈盤青塵尾

老皮張展黑龍鱗
惟堆寒色資琴興
不放秋聲染俗塵
歲月如波事如夢
竟留蒼翠待何人

陳檜

明馬弓

古木凌空百尺過
根盤如石鐵為柯
濃陰不礙金蓮座
虛籟猶傳玉樹歌
倦客解衣頻徙倚
老禪卓錫定摩挲
雲門寺裏梁朝柏
身上苔痕想更多

檜

明章珪

天挺良材聳百尋
托根仙宿歷年深
能薰老柏冰霜操

不讓寒梅鐵石心
夜靜繞壇星布列
月明滿地翠陰森
工師若選明堂用
為棟為梁價萬金

五言絕句

檜和子由

宋蘇軾

依依古松子鬱鬱綠毛身
每長須成節明年漸庇人

七言絕句

自遣詩

唐陸龜蒙

花瀨濛濛紫氣昏
水邊山曲更容村
終須棟取幽棲地

老檜成雙便作門

和重元寺雙矮檜

陸龜蒙

可憐煙刺是青螺如到雙林誤禮多
更憶早秋登北固海門蒼翠出晴波

醒聞檜

唐皮日休

解洗餘醒晨半酒星星仙吹起雲門耳根莫厭聽佳木
會盡山中寂靜源

重元寺雙矮檜

皮日休

撲地枝回是翠鈿，碧絲籠細不成煙。應如天竺難陀寺，
一對狻猊相枕眠。

題法雲寺雙檜

唐方壺居士

謝郎雙檜綠於雲，昏曉濃陰色未分。若並亳宮仙鹿跡，
定知高峭不如君。

古檜

元虞集

根到深泉石作身，疎疎香葉不知春。海波不動天風遠，
千歲寒蛟作老人。

御定佩文齋詠物詩選卷二百七十九

欽定四庫全書薈要卷一萬八千九百二

集部

御定佩文齋詠物詩選卷二百八十

杉類

五言古

郡齋移杉

唐
韋應物

擢榦方數尺幽姿已蒼然
結根西山寺來植郡齋前
新含野露氣稍靜高窗眠
雖為賞心遇豈有巖中緣

栽杉

唐
白居易

勁葉森利劍孤莖挺端標纜高四五尺勢若干青霄移
栽東窗前愛爾寒不凋病夫卧相對日夕聞蕭蕭昨為
山中樹今為蒼下條雖然遇賞翫無乃近塵囂猶勝澗
谷底埋沒隨衆樵不見鬱鬱松委質山上苗

長短句

古杉行

元
范
梈

丹陵觀有古杉屹如雙闕當雲門云是鍾君之手植君
去此樹餘空村尾搖翡翠捎八表根結蛇蛟行九原幽

邊豈無鬼神護深處直形天地思一方拆裂引穿溜猶
是百年燒火痕蒼皮樹裏漸欲合始知草木有道存或
云下有丹火伏四時地底皆春溫神還復壯此其驗疑
是自此無傳喧平生政坐嗜竒古來看適值寒冬昏長
歌沈思繞其下夜半月高松露繁飄颻葉懸鳧鳥影牢
落豐城龍劍魂何當喚起博物者共騎黃鵠凌崑崙

七言絕句

題中峯杉徑

宋朱子

盤回山腹轉修蛇
橫入中峯小隱家
好把穉杉緣徑插
待迎涼月看清華

御定佩文齋詠物詩選卷二百八十

欽定四庫全書薈要卷一萬八千九百三

集部

御定佩文齋詠物詩選卷二百八十一

榆類

五言古

榆

明
吳寬

始我種三榆近在亭之左
西日待隱蔽陰成客能坐
七年長漸高密葉已交鎖
生錢聞可食貧者當果蘇
其一
忽憔悴嚙腹緣蟻螺持斧
欲伐之材未中船舵藤蔓
方

附麗不伐亦自可古人無棄物守圃常用跛

五言絕句

榆

宋張耒

修柯遇雲日老枿干虹霓嗟爾臃腫材大匠何見遺

七言絕句

貧居春怨

唐雍陶

貧居盡日冷風煙獨向簷牀看雨眠寂寞春風花落後
滿庭榆莢似秋天

榆錢

宋 孔平仲

鏤雪裁綃箇箇圓日斜風定穩如穿憑誰細與東君說
買住青春費幾錢

春晚

宋 僧道潛

疊穎叢條翠欲流午陰濃處聽鳴鳩兒童賭罷榆錢去
狼藉春風漫不收

次韻答李揅之

明 王弼

梢拙爐頭擁薄綿嫩寒微雨暮春天不知詩思能多少

榆葉梨花已滿前

無題

明
康 栗

笑看海雲初起處
吾家隱隱碧天隅
何時跨鶴隨風去
同與仙人坐白榆

御定佩文齋詠物詩選卷二百八十一

欽定四庫全書會要卷一萬八千九百四

集部

御定佩文齋詠物詩選卷二百八十二

槐類

七言古

孔林瑞槐歌

元

納新

闕里陰陰槐樹古百尺長柯挾風雨密葉盤空擁翠雲
深根貫石流瓊乳蒼皮皴蝕紋異常天成篆籀分毫芒
游絲縈錯科斗亂雲氣飛動龍鸞翔羸秦書焚士坑僂

幾歎遺經藏壁屋
千年聖道復昭明
喜見文章出嘉木
神明元冑嗣上公
雨露滋沐深培封
清陰如水石壇靜
彈琴樹底歌薰風

五言律

詠槐

唐李嶠

暮律移寒火
春宮長舊栽
葉生馳道側
花落鳳庭隈
烈士懷忠觸
鴻儒訪業來
何當赤墀下
疎幹擬三台

七言律

槐花

唐羅鄴

行宮門外陌銅駝兩畔分栽此最多
欲到清秋近時節
爭看金縷向關河
層樓寄恨飄珠箔
駿馬憐香撼玉珂
愁殺江南隨計者
年年為爾刺奔波

宮槐

宋梅堯臣

漢家宮殿蔭長槐
嫩色蔥蔥不染埃
天仗龍旂穿影去
鈎陳豹尾拂枝來
青蟲挂後蜂銜子
素月生來桂並栽
我意方同杜工部
冷淘惟喜葉新開

五言絕句

宮槐陌

唐王維

仄徑蔭宮槐，幽陰多綠苔。
應門但迎掃，畏有山僧來。

宮槐陌

唐裴迪

門前宮槐陌，是向歌湖道。
秋來山雨多，落葉無人掃。

槐

宋蘇軾

采擷殊未厭，忽然已成陰。
蟬鳴看不見，鶴立赴還深。

罷直圖

明練子寧

草詔下金鑾宮槐白露寒紫騮驕不鞚明月在闌干

七言絕句

送人入蜀

唐楊凝

劍閣迢迢夢想間行人歸路繞梁山
明朝騎馬搖鞭去
秋雨槐花子午關

槐花

唐鄭谷

毳毼金縷撲晴空舉子心驚落照中
今日老郎猶有恨
昔年相謔十秋風

題槐

唐翁承贊

雨中妝點望中黃
勾引蟬聲送夕陽
憶得當年隨計吏
馬蹄終日為君忙

谿陰堂

宋蘇軾

白水滿時雙鷺下
綠槐高處一蟬吟
酒醒門外三竿日
卧看谿南十畝陰

軾以去歲春夏侍立邇英而秋冬之交子由相

繼入侍次韻絕句四首各述所懷錄一

曛曛日脚曉猶清
細細槐花暖欲零
坐閱諸公平
廊廟時看黃色起
天庭

夏日田園雜興

宋范成大

槐葉初勻日氣涼
蔥蔥鼠耳翠成雙
三公只得三枝看
閒客清陰滿北窗

槐影

宋許月卿

槐影本來惟戴日
蟬聲固自未知秋
斜陽薄雨羊歸徑

冷月橫星人倚樓

玉堂槐花

金趙秉文

玉堂陰合冷窗紗
雨過銀泥引篆螭
萱草茂葵俱不見
蜂聲滿院采槐花

玉堂閒適圖

元王惲

醉岸烏紗殿影東
宮花低映酒波紅
興來草罷長楊賦
獨占高槐灑晚風

即事

元趙孟頫

庭槐風靜綠陰多
睡起茶餘日影過
自笑老來無復夢
閒看行蟻上南柯

庭槐

元 鄭允端

風轉庭槐拂檻開
綠陰如染淨無埃
婦人不作功名夢
閒看南柯蟻往來

擬宮詞

明 袁宏道

百子池頭九子萍
美人雙照月稜青
宮槐葉落秋如水
誦得蓮花兩卷經

御定佩文齋詠物詩選卷二百八十二

欽定四庫全書薈要卷一萬八千九百五

集部

御定佩文齋詠物詩選卷二百八十三

梧桐類

五言古

雙桐

魏明帝

雙桐生空井枝葉自相加
通泉浸其根元雨潤其柯

詠桐

齊王融

鶯鳳影層枝輕虹鏡展綠
豈斲龍門幽直慕瑤池曲

遊東堂詠桐

齊謝朓

孤桐北窗外高枝百尺餘葉生既婀娜葉落更扶疎無
華復無實何以贈離居裁為珪與瑞足可命參墟

詠孤桐

梁沈約

龍門百尺時排雲少孤立分根蔭玉池欲待高鸞集

詠梧桐

沈約

秋還遽已落春曉猶未萸微葉雖可賤一剪或成珪

詠桐

隋魏澹

本求裁作瑟何用削成珪願寄華庭裏枝橫待鳳棲

答李伯魚桐竹

唐張說

結廬桐竹下室邇人相深接垣分竹徑隔戶共桐陰落
花朝滿岸明月夜披林竹有龍鳴管桐留鳳舞琴竒聲
與高節非君誰賞心

桐竹贈張燕公

唐李伯魚

北竹青桐北南桐綠竹南竹林君早愛桐樹我初貪鳳
棲桐不愧鳳食竹何慚棲食更如此餘非鳳所堪

段宥廳孤桐

唐王昌齡

鳳凰所宿處月映孤桐寒
槁葉零落盡空柯蒼翠殘
虛心誰能見直影非無端
響發調尚苦清商勞一彈

題僧房雙桐

唐李頎

青桐雙拂日傍帶凌霄花
綠葉傳僧磬清陰潤井華
誰能事音律焦尾蔡邕家

梧桐

唐戴叔倫

亭亭南軒外貞幹修且直
廣葉接青陰繁花連素色
天

資韶雅性不愧知音識

題鮮于子駿桐軒

宋司馬光

朝陽升東隅照此庭下桐
拳拳復萋萋居然古人風
疎枝青玉聳密葉翠羽蒙
午景凝餘清夕照留殘紅
雨響甍棟外風生戶牖中
主人政多暇步賞幸從容
終當致威鳳覽德鳴
嗷嗷又將施五絃解愠歌帝宮

擬古

金張建

拳拳嶧山桐一樹十二枝
枝分十二律所指各不移
何

為師襄子獨謂東南竒一律不可缺一枝不可遺誰能
以此意說似典樂變

桐樹

明高啟

晴粉朝英墜涼瓊夏葉舒鳥啼高樹早蟬轉薄疏虛朱
絃未薦曲彤管屢題詩坐恐銷華澤商吹起前除

洗桐

明王問

梧桐生高岡峩峩貽夏陰挹取葉上露為予洗其心有
時藉槁君閒情寄徽音何以報爾德激泉濯朝林永日

影相對勿使塵澆侵

七言古

登樂陵臺倚梧桐望月有懷南臺李御史藝七

夕後一日也

元薩都拉

涼風吹墮梧桐葉瀉下泠泠露華白樂陵臺上悄無人
獨倚梧桐看秋月月高當午桐陰直不覺衣露露華濕
此時却憶在金陵酒醒江樓聽吹笛

五言律

桐

唐李嶠

孤秀嶧陽岑亭亭出眾林春光雜鳳影秋月弄圭陰高
映龍門迴雙依玉井深不因將入爨誰為作鳴琴

次韻擇之梧竹二首并呈季通

宋朱子

永日長梧下清陰小院幽自憐風嫋嫋客賦雨瀏瀏作
別今千里相思欲九秋更憐同社友復此誤淹留

月下新桐喜徐元歎至

明鍾惺

是物多妨月，桐陰殊不然。
長如晨露引，不隔晚涼天。
綠滿清虛內，光生幽獨邊。
懷新君亦爾，到在夕陽先。

七言律

周履道徵賦梧桐月

明周翼

雲捲清秋畫角悲，梧桐滿地月明時。
斜穿翠葉通銀井，化作金波落硯池。
青女乍驚烏鵲夢，素娥偏惜鳳凰枝。
故人有約來何暮，獨立雲堦影漸移。

五言絕句

題桐葉

唐韋應物

參差剪綠綺蕭灑覆瓊柯憶在灋東寺偏書此葉多

七言絕句

丹丘

唐李商隱

青女丁寧結夜霜羲和辛苦送朝陽丹丘萬里無消息
幾對梧桐憶鳳凰

蜀桐

李商隱

玉壘高桐拂玉繩上含非霧下含冰枉教紫鳳無棲處

斲作秋琴彈廣陵

齊安偶題

唐杜牧

秋聲無不攬
離心夢澤蕪
葭楚雨深自
摘階前大梧
葉
干君何事動
哀吟

夜

宋朱子

獨宿山房夜氣清
一窗涼月共虛明
鄰雞未作人聲寂
時聽高梧滴露聲

暑中雜興

宋方岳

是非不到野谿邊只就梧桐聽雨眠睡熟不知谿水長
鷺鷥飛上釣魚船

暮春

金蔡珪

陌上歌聲枕上聽秋千梧影兩亭亭春風三月正花好
曉日一竿初酒醒

桐花

元方回

悵惜年光怨子規王孫見事一何遲等閒春過三分二
憑仗桐花報與知

和薛伯通韻

元 耶律楚材

黃花紅葉滿秋山
月浸銀河夜未闌
寂寞梧桐深院落
有人何處倚闌干

懷友時住夏玉泉山

元 黃清老

遠水平林翠繞城
秋來風雨動離情
玉泉千尺梧桐樹
月下時聞落葉聲

春日雜詠

元 吳景奎

野人居處絕紛譁
芳援疎籬八九家
昨夜山中風雨急

曉來門巷掃桐花

梧桐

元 丁鶴年

井梧徹夜下霜風
錦繡園林瞬息空
老盡秋容何足惜
鳳巢吹墮月明中

梧桐

元 鄭允端

梧桐葉上秋先到
索索蕭蕭向樹鳴
為報西風莫吹却
夜深留取聽秋聲

秋閨思

明 孫 蕢

涼夜簫聲處處過
玉樓高起偏天河
西風瘦盡梧桐葉
添得西窗月影多

醉起

明
黃姬水

山中長日臥煙霞
車馬無塵靜不譁
石上酒醒天已暮
一簾月色覆桐花

御定佩文齋詠物詩選卷二百八十三

欽定四庫全書薈要卷一萬八千九百六

集部

御定佩文齋詠物詩選卷二百八十四

榕類

五言律

南峯庵庵徑有古榕樹懸枝對峙宛若關門

明傅汝舟

古樹上危根依天巧作門雲飛不在外虎過定消魂野
客逢迎少山僧出入尊朋遊坐不厭葉落滿金樽

七言絕句

柳州二月榕葉落盡偶題

唐柳宗元

宦情羈思共淒淒
春半如秋意轉迷
山城過雨百花盡
榕葉滿庭鶯亂啼

榕谿閣

山谷南遷
維舟榕下

宋劉克莊

榕聲竹影一谿風
遷客曾來繫短篷
我與竹君俱晚出
兩榕猶及識涪翁

御定佩文齋詠物詩選卷二百八十四

欽定四庫全書薈要卷一萬八千九百七

集部

御定佩文齋詠物詩選卷二百八十五

椿類

七言古

靈椿

宋劉敞

野人獨愛靈椿館
館西靈椿聳危幹
風揉雨煉三月餘
奕奕中庭蔭華傘

七言絕句

天壇雜詩

金元好問

谿童相對採椿芽
指似陽坡說種瓜
想得近山營馬少
青林深處有人家

御定佩文齋詠物詩選卷二百八十五

欽定四庫全書薈要卷一萬八千九百八

集部

御定佩文齋詠物詩選卷二百八十六

楠類

五言古

和宣州錢判官使院廳前石楠樹

唐孟郊

大樸既一剖衆材爭萬殊懿茲南海華來與北壤俱生
長如自惜雪霜無凋渝籠籠抱靈秀簇簇抽芳膚寒日

吐再艷頰子流細珠鴛鴦花數重翡翠葉四鋪雨洗新
妝色一枝如一姝聳異敷庭際傾妍來坐隅散彩飾几
案餘輝盈盤盃高意因造化常情逐榮枯主公方寸中
陶植在須臾養此奉君子賞覲日為娛始覺石楠詠價
傾賦兩都棠頌庶可比桂詞難以踰因謝丘墟木空採
落泥塗時來開佳姿道去卧枯株爭芳無由緣受氣如
鬱紆抽肝在郢匠歎息何踟躕

七言古

題巴州光福寺楠木

唐嚴武

楚江長流對楚寺楠木幽生赤崖背臨谿插石盤老根
苔色青蒼山雨痕高枝鬧葉鳥不度半掩白雲朝與暮
香殿蕭條轉密陰花龕滴瀝垂青露聞道偏多越水頭
煙生霽斂使人愁月明忽憶湘川夜猿叫還思鄂渚秋
看君幽靄幾千丈寂寞窮山今遇賞亦知鐘梵報黃昏
猶卧禪林戀竒響

題巴州光福寺楠木

唐史俊

近郭城南山寺深亭亭竒樹出禪林結根幽壑不知歲
聳蓋摩天凡幾尋翠色晚將嵐氣合月光時有夜猿吟
經行綠葉望成蓋宴坐黃花長滿襟此木嘗聞生豫章
今朝獨秀在巴鄉凌霜不肯讓松柏作宇由來稱棟梁
會待良工時一盼應歸法水作慈航

五言律

高楠

唐杜甫

楠樹色冥冥江邊一蓋青近根開藥圃接葉製茅亭落

景陰猶合微風韻可聽尋常絕醉困卧此片時醒

七言律

石楠樹

唐白居易

可憐顏色好陰涼葉剪紅牋花撲霜傘蓋低垂金翡翠
薰籠亂搭繡衣裳春芽細炷千燈焰夏葉濃聞百和香
見說上林無此樹只教桃柳占年芳

七言絕句

看石楠花

唐王建

留得行人忘却歸雨中須是石楠枝明朝獨上銅臺路
容見花開少許時

石楠

唐
司空圖

客處媮閒未是閒石楠雖好懶頻攀如何風葉西歸路
吹斷寒雲見故山

御定佩文齋詠物詩選卷二百八十六

欽定四庫全書薈要卷一萬八千九百九集部

御定佩文齋詠物詩選卷二百八十七

桑類

五言古

採桑度

晉樂府

蠶生春三月春桑正含綠女兒採春桑歌吹當春曲

種桑詩

宋謝靈運

詩人陳條柯亦有美攘剔前修為誰故後事資紡績常

佩知方誠愧微富教益浮陽鶩嘉月藝桑迨閒隙疎欄
發近郭長行達廣場曠流始發泉面塗猶跬跡俾此將
長成慰我海外役

陌上桑

梁
王臺卿

令月開和景處處動春心挂筐須葉滿息倦重枝陰

春詞

唐
常建

翳翳陌上桑南枝交北堂美人金梯出素手自提筐非
但畏蠶飢盈盈嬌路傍

採桑

唐王建

鳥鳴桑葉間，葉綠條復柔。
扳看去手近，散下長長鈎黃。
花蓋野田白馬少年遊，
所念豈迴顧良人在高樓。

陌上桑

明楊基

青青陌上桑，葉葉帶春雨。
已有催絲人，吐吐桑下語。

長短句

採桑曲

宋鄭震

晴採桑雨採桑，田頭陌上家家忙。
去年養蠶十分熟，蠶

姑只著麻衣裳

採桑曲

明宗璣

桑芽露春微似粟小姑把蠶試新浴素翎頻掃細於蟻
嫩葉纖纖初上指朝採桑暮採桑採桑不得盈頃筐羞
將辛苦向姑語妾命自知桑葉比家中蠶早未成眠大
姑已賣新絲錢岸上何人紫花馬却欲拋金桑樹下

五言絕句

春閨思

唐張仲素

裊裊城邊柳青青陌上桑提籠忘採葉昨夜夢漁陽

楊下採桑

唐張祜

飛絲惹綠塵軟葉對孤輪今朝入園去物色強著人

採桑

唐鄭谷

曉陌攜籠去桑林路隔淮何如鬪百草賭取鳳凰釵

江南樂

明徐禎卿

人言江南樂江南信自樂采桑作蠶絲羅綺任儂著

七言絕句

采桑曲

元趙孟頫


野雉朝雊雊且飛誰家女兒採桑歸欲折花枝插了髻
還愁草露濕裳衣

桑

明陳繼儒

女桑新綠映宮槐三月春風戴勝來織就鴛鴦錦千匹
金刀先取合歡裁

御定佩文齋詠物詩選卷二百八十七



總校官庶吉士臣侍朝

校對官修撰臣張書勳

謄錄監生臣彭希韓

欽定四庫全書薈要

集部

御定詠物詩選卷二百

八十八至
九十五

詳校官原任主事 李斯咏



欽定四庫全書薈要卷一萬八千九百十

集部

御定佩文齋詠物詩選卷二百八十八

楸類

七言絕句

絕句

唐杜甫

楸樹馨香倚釣磯
斬新花葉未應飛
不如醉裏風吹盡
可忍醒時雨打稀

楸樹

唐韓愈

幾歲生成為大樹一朝纏繞困長藤誰人與脫青羅帔
看吐高花萬萬層

其二

幸自枝條能樹立何煩蘿蔓作交加旁人不解尋根本
却道新花勝舊花

夢中絕句

宋蘇軾

楸樹高花欲插天暖風遲日共茫然落英滿地君方見
惆悵春光又一年

楸樹

金元德明

道邊楸樹老龍形
社酒澆來漸有靈
只恐等閒風雨夜
怒隨雷電上青冥

楸花

元段克己

楸樹馨香見未曾
牆西碧蓋聳孤稜
會須雨洗塵埃盡
看吐高花一萬層

御定佩文齋詠物詩選卷二百八十八